

- Central Chief Information Commissioner Pu Heeralal Samariya an Mizoram State Information Commission in tha takin hna an thawk thin tih a rawn hmuh thu a sawi.
- Kawngpui NH 06 laih hna kal meka, Seling khuaa sorkar in hmeithai chenna in a thiah sak chungchangah vawiin khan a tuartu chhungkua te nen cheng nuai 25 in an inrem.
- Maharastra leh Jharkhand Assembly inthlan thawhnhina chu vawiin khan tluang taka neih a ni
- 4 Prime Minister Narendra Modia chuan zanin hian Guyana President Dr. Mohammed Irfaan Ali chu Georgetown-ah a kawm dawn

<><><>

CIC

Ni 2 chung Mizoram tlawha lo zin Central Chief Information Commissioner Pu Heeralal Samariya chuan Mizoram State Information Commission in tha takin hna an thawk thin tih a rawn hmuh thu leh, an hnena case hrang hrang awmte tha takin an chinfel zel thu leh lawmawm a tih thu a sawi.

BYTE

CIC hian nimin khan department hrang hranga State Public Information Officer, First Appellate Authority officer te bakah Village Council hruaitute leh NGO hruaitu hrang hrangte a kawm a, an ni pawhin RTI hmanga mipuite hriat duh hriattir hna an thawh that thu leh, a tlangpuiin an chhannaah mipuite an dukhawp thin thu te, chhannaah dukhawp lo appeal nawn leh an awm mang loh thu an hrih ni a sawiin, lawmawm a tih thu a sawi a. Mizoram chu lehkhathiam tamna ram a nih thu sawiin Mizo mipuite chu RTI Act hmang tangkai zel turin a sawm a ni.

CIC hian vawiin khan Larsap Dr. Hari Babu Kambhampati chu a chenna in Raj Bhavan-ah a hmu a, Governor chuan sorkar tha, rin ngam leh langtlang siam turin Mizo mipuiten RTI Act an hmelhriat chhoh zel thu leh mipuiten tangkai taka an hman thu a sawi a. RTI Act buaipuitute chu mipuite'n information dik leh rintlak an hriat zel theih nana theihtawp chhuaha hma la zel turin a chah a ni.

Pu Heeralal Samariya chuan hmun dang ngaihtuahin Mizorama RTI hmanga dilna lutte hun bituk ni 30 chhunga tha taka chinfel nghal zung zung a ni thin leh, za zela 1 aia tlemin thuneitu sang zawk first appellate authority leh second appellate authority an thleng chu lawmawm a tih thu a sawi a. He huna tarlan a nih danin Mizoramah financial year hmasa kum 2023-2024 chhung khan RTI Act hmanga dilna lut 5,741 awmin dilna lutte chinfel zel niin, second appeal hmanga State Information Commission-a lungawilohna thlen chu zaa pakhat pawh a tlinglo a, insawifiah tura koh an nih hmain heng zinga zaa 90 te hi RTI Act hmanga information diltu hnenah chhanna kimchang an pe vek hman a ni.

Chief Information Commissioner of India hi Mizoram Information Commission-a Chief Information Commissioner Pu John Neihlaia leh Information Commissioner Pu Mangjangam Touthang te'n an tawiawm a ni.

<><><>

SELING house demilotion issue

Kawngpui NH 06 laih hna kal meka, Aizawl district chung Seling khuaa sorkar in hmeithai chenna in a thiah sak chungchangah hmalak nghal niin, vawiin khan a tuartu chhungkua te nen cheng nuai 25 in an inrem.

Nimina sorkarin in a thiah sak duh lohna lantir hian Seling-ah Joint NGO te chuan Centre for Environment & Social Justice (CESJ) te te telin vawiin khan kawng an zawh a. CESJ hruaitu Pi Vanramchhungi, Ruatfela Nu tia hriat lar chuan Akashvani zawhna chhangin sorkarin hmeithai Pi Lalhmangaihi in thiah sak tura DC/CALA leh Revenue ten thuneihna lek an chakna chu mak an tih thu sawiin tui in tur leh thing leh mau chhiar sen loh leh nungcha tichhetute lakah District hotuten vawikhat tal ke an pen em tih chu an zawhna a ni a ti a, hmeithai, taksa lama harsatna nei lehngal chungah hetiang an tih chhan hriat tuma han kal an nih thu a sawi a ni.

Pi Vanramchhuangi chuan a tuartu chhungkua te hi mitthi in an kal laiin thuneituten kawngka kalh vawchhiain bungrua te an thiarchhuak a ni a ti a. Tunhnaia Supreme Court pawhin bulldozer hmanga mi in thiah sak a khap lai leh a tuartu te lehkha an pek atanga insawifiahna hun ni 15 pek tur tih pawh sorkarin a zawm loh thu a sawi a ni.

He thilthleng chungchanga Sorkar thuchhuah tarlan danin The National Highways Act, 1956 under section 3D/3E-in a tarlan angin sorkar hian he ramah hian thuneihna pumhlum a nei tawh a. He rama Compensation latu hming chu Pu Sawihara tiin Deputy Commissioner's Office record-ah hian tarlan a ni a. Competent Authority for Land Acquisition (CALA) chuan cheng nuai 8 sing 2 sang 5, 268 chu Pu Sawihara hnena hlan turin a peih sa tawh a, mahse anni hian an in-hnuai chhût kim loh ni a sawiin compensation hi a la duh lo a. Pu Sawihara dilna angin assessment lak that niin cheng nuai 12 sing 3 sang 8,091 in chhût chhuahsak a ni.

Pu Sawihara assessment leh mi dang 41 assessment tharte hi DC Office/CALA chuan NHIDCL hnenah a thawn leh a. DC Office-in theih tawp a chhuahpui laiin NHIDCL hian Pu Sawihara in leh lo assessment thar leh mi dang 41 assessment te hi a hnâwlsak vek a. Hetiang a nih avang hian ram neitute hian an in leh lo an chhuahsan duh loh avangin NHIDCL hian kawng zauh hna an thawk thei lo a, an harsatna hi Empowered Committee meeting thla hmasa ni 17-a neihah NHIDCL hian a thlen a.

Empowered Committee hian ram leh in laih chhiat ngai engemaw zat chu hmalak a ngaih thu leh hemi chungchang hi Arbitrator hian ching fel se a ti a. Hemi bawhzui zel hian section 3E of National Highway Act, 1956 angin CALA office chuan hma a la ta a ni.

Kan corr thudawn danin, Pu Sawihara, he in neitu hi a thi tawh a, tunah hian a faten he in hi luah mekin, a fate zinga mi Pi Lalhmangaihi hian a luah mek a ni.

VC

Seling bialtu, Prof. Lalnilawma Minister chuan vawiin khan Seling khua hi tlawhin thil thlendan te a sawipui a, Minister chuan thil awm dan hrang hrang a thlirna atangin Competent Authority For Land Aquisition (CALA) te leh ram neitute thu leh hla inhmuh tawn loh vanga hetiang thil lo thleng ta ni a a hriat thu a sawi a ni. He hunah hian Rev V.Lalrozuala Seling Bialtu Pastor pawhin NHIDCL kawng laih meka BCM Seling Biak In hmun chungchanga an harsatna tawhte minister hnenah hian a thlen a, an harsatna tawhte chu a chinfel dan kawng awm theite ngaihtuahpui turin minister hi a ngen bawk a ni.

Hei bakah hian Seling khawtlang hruaitute leh Ram neitu compensation a harsatna tawh mekte chuan, Bialtu MLA in an harsatnate ngaihvena Seling khua a thleng chu thlamuan thlak an tih thu an sawi a, an harsatna tawh mek chinfel thuai a nih an beisei thu an hrilh bawh a ni.

<><><>

FLOWER SHOW

Aijal Club park, Aizawla Winter Fair cum Flower Show neih mek chu mipuiten an hlut hle a, tlawhtu mipui an tam zel tih Mizoram Florist Association Senior Vice President Pi Vanlalzawni chuan Akashvani corr a hrilh.

Pi Vanlalzawni chuan Flower show huaihawt chu a hautak avangin kum 1 ah vawi 1 an huaihawt thei tlangpui tih a sawi a. Kuminah pawh Horticulture department, State Medicinal Plants Board leh an member thenkhatin an sponsor avang chauha huaihawt thei an nih thu a sawi a ni.

Mizoram Florist Association Senior Vice President chuan kuminah hian Stall 90 chuang a awm thu a sawi a. Hmun dang atanga chah luh an phochhuah ve ngai loh thu sawiin Mizoram leilung leh sik leh sa mil sa, Mizoram chung ngeia rei tak an lo phun nun tawh leh enkawl tawh chauh an phochhuak a ti a. Pangpar phochhuaktu an pawl member te chu chhungkaw eizawna ber atana hmang an awm nual thu a sawi. Flower show chhungin kumdanga an lo huaihawt tawhah cheng nuai 40 man te an hralh tlin thin thu a sawi bawh a. Flower show an huaihawt mekah mipuite chu a tam thei ang ber kal turin a sawm a ni.

<><><>

ELECTION

Maharastra leh Jharkhand Assembly inthlan thawhnhina chu vawiin khan tuang taka neih a ni a. Hriat theih chinah tlai dar 3 thleng khan Jharkhand-ah vote zaa 61.47 a tla a. Maharastra-ah hian tlai dar 3 thlengin vote zaa 45.53 a tla a ni.

Jharkhand-ah hian Assembly bial 38 ah inthlan a ni a. Maharastra ah chuan seat 288 ah vote thlak a ni. Hei bakah hian Maharastra-a Nanded Lok Sabha bial leh State pali- Punjab, Uttar Pradesh, Kerala leh Uttarakhand-a Assembly bial 15 inthlan thatnaah te vote thlak a ni bawh.

Inthlana vote tla te hi tun thla ni 23 ah chhiar a ni ang.

<><><>

PM IN GUYANA

Prime Minister Narendra Modia chuan zanin hian Guyana President Dr. Mohammed Irfaan Ali chu Georgetown-ah a kawm dawn a. Hemi hnu hian ram pahnihten inremna engemawzat an ziah beisei a ni. Prime Minister Narendra Modia chuan hlawhtling taka Brazil-a hun a hman hnuin ni thum cham turin tukin khan Guyana a thleng a. Kum 1968 hnua India Prime minister zinga Guyana tlawh leh hmasa ber a ni a. CARICOM-India Summit vawi hnihnaah a tel dawn bawh a ni.

<><><>

IFFA

International Film Festival of India (IFFA) chu vawiin tlai khan Goa-a tan a ni a. Tun thla ni 28 thleng IFFA hi neih a ni ang. Dr. Shyama Prasad Mukherjee stadium-ah IFFA hi neih a ni a. Film khawvela mi hmingthang tak takte an kalkhawm dawn a ni. A hawnnaah hian Indian cinema chanchin hrang hrangte tarlan a ni.

Kan Correspondent report I lo ngaithla ang u.

<><><>